

樂府詩集

冊三

樂府詩集卷第九十一

太原 郭茂倩

編次

新樂府辭

樂府雜題

祖龍行

韋楚老

漢書五行志曰秦始皇三十六年鄭客從關東來至華陰望見素車白馬從華山上下知其非人道住止而待之遂至持璧與客曰爲我遺鑄池君因言今年祖龍死忽不見鄭客奉璧卽始皇二十八年過江所湛璧也是歲始皇死後三年而秦滅顏師古曰此直江神告鑄池之神以始皇將死爾蘇林曰祖始也龍人君象謂始皇也應劭曰祖人之先龍君之象祖龍行蓋出於此

黑雲兵氣射天裂壯士朝眠夢冤結祖龍一夜死沙丘胡亥空隨鮑

魚轍腐肉偷生二千里僞書先賜扶蘇死墓接驪山土未乾瑞光已
向芒碭起陳勝城中鼓二下秦家天地如崩瓦龍蛇撩亂入咸陽少
帝空隨漢家馬

鄴都引

張說

君不見魏武草創爭天祿羣雄睚眦相馳逐晝攜壯士破堅陣夜接
詞人賦華屋都邑繚繞西山陽桑榆漫漫漳河曲城郭爲墟人改代
但有西園明月在鄴傍高塚多貴臣蛾眉曼睩共灰塵試上銅臺歌
舞處唯有秋風愁殺人

孟門行

崔顥

黃雀銜黃花

一作黃花

翩翩傍簷隙本擬報君恩如何反彈射金罍美酒

滿座春平原愛財多衆賓滿堂盡是忠義士何意得有讒諛人諛人
翻覆那可道能令君心不自保北園新栽桃李枝根株未固何轉移
成陰結子君自取若問傍人那得知

邯鄲宮人怨

邯鄲陌上三月春莫行逢見一婦人自言鄉里本燕趙少小隨家西
入秦母兄憐愛無儔侶五歲名爲阿嬌女七歲丰茸好顏色八歲黠
惠能言語十三兄弟教詩書十五青樓學歌舞我家青樓臨道傍紗
窗綺幔暗聞香日暮笙歌君駐馬春日妝梳妾斷腸不用城南使君
婿本求三十侍中郎何知漢帝好容色玉輦攜歸登建章建章宮殿
不知數萬戶千門深且長百堵椒塗接青瑣九華閣道連洞房水晶
簾箔雲母扇瑠璃窗牖玳瑁牀歲歲年年奉懽宴嬌貴容華誰不羨
恩情莫比陳皇后寵愛全勝趙飛燕瑤房侍寢世莫知金屋更衣人
不見誰言一朝復一日君王棄世市朝變宮車出葬茂陵田賤妾獨
留長信殿一朝太子升至尊兩宮人事如掌鬣同時侍女見讒毀後
來新人莫一作不敢言兄弟印綬皆被奪昔年賞賜不復存一旦放歸
舊鄉里乘車垂淚還入門父母愍我曾富貴嫁與西舍金王孫念此

翻覆復何道百年盛衰誰能保憶昨尙如春日花悲今已作秋時草
少年去去莫停鞭人生萬事由上天非我今日獨如此古今歇薄皆
共然

吳宮怨

衛萬

君不見吳王宮閣臨江起不卷珠簾見江水曉氣晴來雙闕間潮聲
夜落千門裏句踐城中非舊春姑蘇臺下起黃塵祇今唯有西江月
曾照吳王宮裏人

同前

張籍

吳宮四面秋江水江清露白芙蓉死吳王醉後欲更衣座上美人嬌
不起宮中千門復萬戶君恩返覆誰能數君心與妾既不同徒向君
前作歌舞葉莢滿宮紅實垂秋風裊裊生繁枝姑蘇臺上夕燕罷他
人侍寢還獨歸白日在天光在地君今詎得長相棄

青樓曲二首

王昌齡

白馬金鞍從武皇
旌旗十萬宿長楊
樓頭小婦鳴箏坐
遙見飛塵入建章

馳道楊花滿御溝
紅妝纓綰上青樓
金章紫綬千餘騎
夫婿朝回初拜侯

同前

青樓臨大道一上一迴老
所思終不來極目傷春草

中流曲

崔國輔

歸時日尚早更欲向芳洲
渡口水流急迴船不自由

聖壽無疆詞十首

韋巨源

文物京華盛謳歌國步康
瑤池供壽酒銀漢麗宸章
雨露涵雙闕雷霆肅萬方
代推仙祚遠春共聖恩長
鳳展臨花暖龍鱸傍日香
遙知千萬歲天意奉君王

鵷鷺彤庭際軒車綺陌前
九城多好色萬井半祥烟
人醉逢堯酒鸞

歌答舜弦花明御溝水香暖禁城天錫宴文逾感微歡物更妍無窮
豔陽月長照太平年

雲陞臨黃道天門在碧虛大明含睿藻元氣抱宸居戈偃征苗後詩
傳宴鎬初年華富仙苑時哲滿公車化入綢緼大恩垂渙汗餘悠然
萬方靜風俗揖華胥

玉漏飄青瑣金鋪麗紫宸雲山九門曙天地一家春瑞靄方呈賞暄
風本配仁巖廊開鳳翼水殿壓鼈身文雅逢明代歡娛及賤臣年年
未央闕恩共物華新

垂拱乾坤正歡心品類同紫烟含北極玄澤付東風珠綴留晴景金
莖直曉空發生資盛德交泰讓全功間氣登三事祥光啓四聰遐荒
似川水天外亦朝宗

代是文明晝春當宴喜時鑪烟添柳重宮漏出花遲漢典方寬律周
官正採詩碧霄傳鳳吹紅旭在龍旂造化膺神契陽和沃聖思無因

隨百獸率舞奉丹墀

睿德符玄化芳情翊太和日輪皇鑒遠天仗聖朝多曙色含金榜晴
光轉玉珂中宮陳廣樂元老進賡歌蓮葉看龜上桐花識鳳過小臣
空擊壤滄海是恩波

物象朝高殿簪裾溢上京春當九衢好天向萬方明樂報簫韶發林
看沆瀣生芙蓉丹闕暖楊柳玉樓晴闔闔開中禁衣裳儼太清南山
同聖壽長獻鳳凰城

日上蒼龍闕香含紫禁林晴光五雲疊春色九天深賞協元和德文
垂雅頌音景雲隨御輦顙氣在宸襟永保無疆壽長懷不戰心聖朝
多慶賜瓊樹粉牆陰

化洽生成遂功宣動植知瑞凝三秀草春入萬年枝鳳披嘉言進鶴
行喜氣隨仗臨丹地近衣對碧山垂渥澤方柔遠聰明本聽卑願同
東觀事長覩漢威儀

朝元引四首

陳陶

帝燭熒煌下九天蓬萊宮曉玉鑪烟無央鸞鳳隨金母來賀薰風一
萬年

玉殿雲開露冕旒下方珠翠壓鰲頭天雞唱罷南山曙春色光輝十
二樓

萬寓靈祥擁帝居東華元老薦屠蘇龍池遙望非烟拜五色瞳矐在
玉壺

寶祚河宮一向清龜魚天篆益分明近臣誰獻登封草五嶽齊呼萬
歲聲

平蕃曲三首

劉長卿

吹角報蕃營迴軍欲洗兵已教青海外自築漢家城
渺渺戍烟孤茫茫塞草枯隴關何用閉萬里不防胡
絕漠大軍還平沙獨戍閒空留一片石萬古在燕山

悲陳陶

杜甫

孟冬十郡良家子
血作陳陶澤中水
野曠天清無戰聲
四萬義軍同日死
羣胡歸來血洗箭
仍唱胡歌飲都市
都人回面向北啼
日夜更望官軍至

悲青坂

我軍青坂在東門
天寒斂馬太白窟
黃頭奚兒日向西
數騎彎弓敢馳突
山雪河冰野蕭颼
青是烽烟白人骨
焉得附書與我軍
忍待明年莫倉卒

哀江頭

少陵野老吞聲哭
春日潛行曲江曲
江頭宮殿鎖千門
細柳新蒲爲誰綠
憶昔霓旌下南苑
苑中萬物生顏色
昭陽殿一作裏第一人同

輦隨君侍君側
輦前才人帶弓箭
白馬嚼齧黃金勒
翻身向天仰射雲一箭
正墜雙飛翼
明眸皓齒今何在
血污遊魂歸不得
清渭東流

劍閣深去住彼此無消息人生有情淚霑臆江水江花豈終極黃昏
胡騎塵滿城欲往城南望城北一作望南北

哀王孫

長安城頭頭白烏夜飛延秋門上呼又向人家啄大屋屋底達官走
避胡金鞭斷折九馬死骨肉不待同馳驅腰下寶玦青珊瑚可憐王
孫泣路隅問之不肯道姓名但道困苦乞爲奴已經百日竄荆棘身
上無有完肌膚高帝子孫盡高準龍種自與常人殊豺狼在邑龍在
野王孫善保千金軀不敢長語臨交衢且爲王孫立斯須昨夜東風
吹血腥東來橐駝滿舊都朔方健兒好身手昔何勇銳今何愚竊聞
天子已傳位聖德北服南單于花門勢面請雪恥慎勿出口他人狙
哀哉王孫慎勿疎五陵佳氣無時無

兵車行

車麟麟馬蕭蕭行人弓箭各在腰爺娘妻子走相送塵埃不見咸陽

橋牽衣頓足攔道哭哭聲直上干雲霄道傍過者問行人行人但云
點行頻或從十五北防河便至四十西營田去時里正與裏頭歸來
頭白還戍邊邊亭流血成海水武皇開邊意未已君不聞漢家山東
二百州千村萬落生荆杞縱有健婦把鋤犁禾生隴畝無東西況復
秦兵耐苦戰被驅不異犬與雞長者雖有問役夫敢申恨且如今年
冬未休關西卒一云役夫心益憤如今縣官急索租租稅從何出信
知生男惡反是生女好生女猶是嫁比鄰生男埋沒隨百草君不見
青海頭古來白骨無人收新鬼煩冤舊鬼哭天陰雨溼聲啾啾

來從寶車騎

李益

東髮逢世屯懷恩抱明義讀書良不武學劍慚非智遂別魯諸生來
從寶車騎追兵赴邊急絡馬黃金轡出入燕南陲由來重意氣自經
皋蘭戰又破樓煩地西北護三邊東南留一尉時過如雲雨參差不
自意將軍失恩澤萬事從此異置酒高樓上灑暮秋風起長戟與我

歸歸來同棄置自酌還自飲非名又非利歌出易水寒琴下雍門淚
出逢平樂舊言在天階侍問我從軍苦自陳少年貴丈夫交四海從
論身自致漢將不封侯蘇卿來遠使令我終此曲此曲成不易貴人
難識心何由知忌諱

憶長安曲二首

岑參

東望望長安正值日初出長安不可見但見長安日
長安何處在只在馬蹄下明日歸長安爲君急走馬

九曲詞三首

高適

河圖曰黃河出崑崙山東北流千里折西而行至於蒲
山南流千里至於華山之陰東流千里至於桓雍北流
千里至於下津河水九曲長九千里入於渤海酈道元
水經注曰黃河百里一小曲千里一曲一直矣新唐書
曰天寶中哥舒翰攻破吐蕃洪濟大莫等城收黃河九

曲以其地置洮陽郡適由是作九曲詞

鐵騎橫行鐵嶺頭西看邏遼取封侯青海只今將飲馬黃河不用更防秋

許國從來徹廟堂連年不爲在疆場將軍天上封侯印御史臺中異姓王

萬騎爭歌楊柳春千場對舞繡麒麟到處盡逢歡洽事相看總是太平人

情人玉清歌

畢耀

洛陽城中有一人名玉清可憐玉清如其名善斜柯能獨立嬋娟花豔無人及珠爲裙玉爲纓臨春風吹玉笙悠悠滿天星萬金閣上晚妝成雲和曲中爲慢聲玉梯不得踏搖袂兩盈盈城頭之日復何情

湘中弦二首

崔塗

烟愁雨細雲冥冥杜蘭香老三湘清故山望斷不知處鶉鴉隔花啼

一聲

蒼山遙遙江潏潏路傍老盡無閒人王孫不見草空綠惆悵渡頭春
復春

湘弦怨

孟郊

昧者理芳草蒿蘭同一鋤狂飆怒秋林曲植同一枯嘉木忌深蠹哲
人悲巧誣靈均入迴流靳尚爲良謨我願分衆泉清濁各異渠我願
分衆巢梟鸞相遠居此志諒難保此情竟何如湘弦少知意孤響空
踟躕

湘弦曲

莊南傑

楚琴錚錚夏秋露巫雲雨脚飛朝暮古磬高敲百尺樓孤猿夜哭千
丈樹雲軒碾火聲瓏瓏連山卷盡長江空鷲啼寂寞花枝雨鬼嘯荒
郊松柏風滿堂怨咽悲相續具調中含古離曲繁弦響絕楚魂遙湘
山水碧天山綠

促促曲

李益

促促何促促黃河九回曲嫁與棹船郎空牀將影宿不道君心不如石那教妾貌長如玉

促促詞

王建

促促復刺刺水中無魚山無石少年雖嫁不將歸白頭猶著父母衣四邊田宅非所有我身不及逐雞飛出門若有歸死處猛虎當衝向前去百年不遺踏君門在家誰喚爲新婦豈不見他鄰舍娘嫁來長在舅姑傍

同前

張籍

促促復促促家貧夫婦歡不足今年爲人送租船去年捕魚在江邊家中姑老子復小自執吳綃輸稅錢家家桑麻滿地黑念君一身空努力乍教牛蹄團團羊角直君身長在應不得

樓上女兒曲

盧仝

誰家女兒樓上頭，指麾婢子掛簾鉤。
林花撩亂心之愁，卷却羅袖彈箜篌。
箜篌歷亂五六弦，羅袖掩面啼向天。
相思弦斷情不斷，落花紛紛心欲穿。
心欲穿，憑欄干，相憶柳條綠，相思錦帳寒。
直緣感君恩愛，一回顧使我雙淚長珊珊。
我有嬌靨待君笑，我有嬌蛾待君掃。
顰花爛熳君不來，及至君來花已老。
心腸寸斷誰得知，玉階暮塵生青草。

青青水中蒲三首

韓愈

青青水中蒲，下有一雙魚。
君今上隴去，我在與誰居。
青青水中蒲，長在水中居。
寄語浮萍草，相隨我不如。
青青水中蒲，葉短不出水。
婦人不下堂，行子在萬里。

樂府詩集卷第九十一

東吳毛晉訂正

男辰再訂